



**Finale Resultate Persverklaring vir Remgro Beperk
(Remgro)**

REMGRRO SE PRESTASIE PRYSENSWAARDIG GEGEWE DIE EKONOMIESE KLIMAAT

- **Wesensverdienste per aandeel neem met 32.7% tot 1 486 sent toe**
- **Wesensverdienste per aandeel, uitgesluit eenmalige koste en opsie hermeting, neem met 3.4% tot 1 361 sent af**
- **Totale dividend per aandeel vir die jaar neem met 7.6% tot 495 sent toe**
- **Intrinsieke netto batewaarde per aandeel soos op 30 Junie 2017 was R251.48**

Remgro se belegging in sy bankwese- en versekeringsafdelings het 'n prysenswaardige prestasie vir die jaar geëindig 30 Junie 2017 gelewer. Die bydraes van die nywerheids- en infrastruktuurbeleggings tot wesensverdienste het 'n merkbare verbetering getoon in vergelyking met die resultate van Junie 2016. Die verbruikersproduktebeleggings is hoofsaaklik beïnvloed deur RCL Foods se daling in wesensverdienste, alhoewel, op 'n genormaliseerde basis het wesensverdienste toegeneem.

Vir die jaar tot 30 Junie 2017 het wesensverdienste met 40.0%, van R5 874 miljoen tot R8 221 miljoen, toegeneem, terwyl wesensverdienste per aandeel (WVPA) met 32.7%, van 1 119.6 sent tot 1 485.5 sent, toegeneem het. Die verskil in die toename tussen wesensverdienste en WVPA is aan die impak van die regte-uitgifte in die jaar onder oorsig toe te skryf. Ingesluit in die wesensverdienste van die vergelykende jaar is eenmalige transaksiekoste wat aangegaan is met Mediclinic se regte-uitgifte en die Al Noor Hospitals Group plc (Al Noor)- transaksie ten bedrae van R788 miljoen ("eenmalige koste"), asook 'n negatiewe billike waarde aanpassing van R730 miljoen, wat verband hou met die toename in waarde van skuldbriefhouers se omruilopsie van die skuldbriewe ("opsie hermeting"). Die jaar onder oorsig sluit 'n positiewe billike waarde aanpassing van R687 miljoen in. Met uitsluiting van hierdie items het wesensverdienste met 1.9%, van R7 392 miljoen tot R7 534 miljoen, toegeneem, terwyl WVPA met 3.4%, van 1 409.0 sent tot 1 361.3 sent, afgeneem het. Die toename in wesensverdienste, uitgesluit eenmalige koste en opsie hermeting, is hoofsaaklik die gevolg van hoër bydraes deur die bank- en versekeringsafdelings, KTH en hoër rente-inkomste, wat gedeeltelik teengewerk is deur laer verdienste van RCL Foods en hoër finansieringskoste.

Kommentaar op die prestasie van elk van die onderliggende rapporteringskategorieë word in die Redakteur se aantekeninge uiteengesit.

Remgro se intrinsieke netto batewaarde per aandeel het met 17.9%, vanaf R306.44 op 30 Junie 2016 tot R251.48 op 30 Junie 2017 afgeneem, hoofsaaklik vanweë 'n 40.4% afname in die markwaarde van die Mediclinic-belegging, asook die verwateringseffek van die regte-uitgifte. Die daling in Mediclinic se markwaarde is 'n direkte gevolg van die rand wat teen die Britse pond versterk het en probleme in die Midde-Ooste. Die sluitingsaandeelprys op 30 Junie 2017 was R213.46 (2016: R254.66), wat 'n diskonto van 15.1% (2016: 16.9%) tot die intrinsieke netto batewaarde verteenwoordig.

Kontant by die kern het met R8 445 miljoen tot R12 223 miljoen op 30 Junie 2017 toegeneem grootliks as gevolg van die regte-uitgifte wat R9 811 miljoen geïn het en dividende van R4 276 miljoen wat ontvang is.

Vir die jaar geëindig 30 Junie 2017, is 'n finale dividend van 301 sent per aandeel verklaar uit inkomstereserwes ten opsigte van beide die gewone aandele sonder pariwaarde en die ongenoteerde B-gewone aandele sonder pariwaarde.

Hierdie, tesame met die tussendividend van 194 sent per aandeel, bedra 'n totale dividend van 495 sent per aandeel, wat 'n 7.6% toename verteenwoordig teenoor die totale dividend van 460 sent per aandeel verklaar vir die jaar geëindig 30 Junie 2016.

Jannie Durand, hoofuitvoerende beampte van Remgro, sluit af: "Ons is terdeë bewus van die verslegtende Suid-Afrikaanse ekonomiese toestande en onseker politieke omgewing. Remgro sal egter voortgaan om sy bestaande beleggings te ondersteun en steeds na lewensvatbare beleggingsgeleenthede kyk."

Kontak:	Remgro Beperk Jannie Durand (HUB) (021) 888-3253
Uitgereik en versprei deur:	Keyter Rech Investor Solutions Marlize Keyter (083 701 2021)
Uitreikingsdatum:	20 September 2017
JSE kode:	REM
Webwerf:	www.remgro.com

Redakteur se aantekeninge

Gesondheidsorg

Mediclinic se bydrae tot Remgro se wesensverdienste het R1 875 miljoen (2016: R1 566 miljoen) bedra, wat 'n toename van 19.7% is. Daar moet op gelet word dat Mediclinic se resultate vir die vergelykende tydperk eenmalige transaksiekoste insluit ten bedrae van R891 miljoen (Remgro se gedeelte R386 miljoen) wat aangegaan is met die Al Noor-transaksie. Met uitsluiting van hierdie eenmalige item het Mediclinic se bydrae tot Remgro se wesensverdienste met 3.9%, van R1 952 miljoen tot R1 875 miljoen, afgeneem. Hierdie afname is hoofsaaklik die gevolg van die versterking van die rand teenoor die Britse pond. In Britse pondterme het Mediclinic se bydrae, eenmalige transaksiekoste uitgesluit, met 8.2% toegeneem, hoofsaaklik vanweë Remgro se verhoogde belang in Mediclinic (42.1% tot 44.6%), die insluiting van die resultate van Al Noor en Spire Healthcare Group plc (Spire) vir die volle twaalf maande, asook 'n sterk vertoning in Switserland en goeie organiese groei in Suider-Afrika. Die toename is gedeeltelik teengewerk deur die onderprestasie in die Midde-Oosterse besigheid, wat geraak is deur 'n aantal bedryfs- en regulatoriese faktore, doktervakatures en 'n vertraging in die opening van fasiliteite.

Bankwese

Die wesensverdiensbydrae van die bankafdeling het R3 163 miljoen (2016: R2 989 miljoen) bedra, wat 'n toename van 5.8% is. FirstRand en RMBH het wesensverdiensgroei van onderskeidelik 6.1% en 5.7% gerapporteer. Op 'n genormaliseerde basis, wat sekere nie-bedryfs- en rekeningkundige afwykings uitsluit, het FirstRand en RMBH verdienstegroei van onderskeidelik 7.1% en 6.6% gerapporteer. Hierdie toenames was hoofsaaklik as gevolg van groei in rente-inkomste, ondersteun deur goeie groei in deposito's en 'n positiewe uitwerking danksy hoër gemiddelde rentekoerse, en nie-rente-inkomste weens 'n stewige groei in fooi- en kommissie-inkomste by FNB en van realisasies by RMB se privaat ekwiteitsportefeulje teen marginale hoër vlakke. Die groei in verdienste is gedeeltelik teengewerk deur 'n toename in kredietwaardedalingkoste.

Verbruikersprodukte

Die bydrae van verbruikersprodukte tot Remgro se wesensverdienste het R1 354 miljoen (2016: R1 605 miljoen) bedra, wat 'n daling van 15.6% is. RCL Foods se bydrae tot Remgro se wesensverdienste het met 34.3% tot R424 miljoen (2016: R645 miljoen) afgeneem. In die vergelykende tydperk is RCL Foods se resultate positief beïnvloed deur die vrystelling van R163 miljoen wat vir onsekerse belastingdispute as deel van die Foodcorp-verkryging voorsien is, asook 'n wins van R119 miljoen wat met die uitoefening van die Zam Chick- en Zamhatch-verkoopsopsies gerealiseer is. Op 'n genormaliseerde basis het RCL Foods wesensverdiestegroei van 7.7% gerapporteer. Die suikerbesigheid het baat gevind by prysverhogings, wat laer volumes teengewerk het, terwyl die hoenderbesigheid geaffekteer is deur 'n massiewe ooraanbod in die plaaslike mark wat deur plaaslike produksie en die storting van ingevoerde hoender veroorsaak is. Unilever se bydrae tot Remgro se wesensverdienste het met 2.6% tot R449 miljoen (2016: R461 miljoen) afgeneem. Hierdie afname was hoofsaaklik te wyte aan laer belastingtoelaes na afloop van die voltooiing van vervaardigingsbeleggings, asook 'n swakker handelomgewing. Distell se bydrae tot wesensverdienste, wat die belegging in Capevin Holdings insluit, het R481 miljoen (2016: R499 miljoen) bedra. Distell se resultate is negatief beïnvloed deur die sterker rand, veral teenoor die Britse pond, asook hewige kompetisie en druk op verbruikers. Distell het wesensverdiestegroei, wat aangepas is vir buitelandse wisselkoersbewegings, van 7.4% gerapporteer.

Versekering

RMI Holdings se bydrae tot wesensverdienste het met 17.2% tot R1 041 miljoen (2016: R888 miljoen) toegeneem. Op 'n genormaliseerde basis het RMI Holdings 'n toename van 16.4% in verdienste gerapporteer, hoofsaaklik danksy die vertonings van OUTsurance en Discovery, wat onderskeidelik verdienstegroei van 25.7% en 8.2% behaal het. Die sterk vertoning deur OUTsurance is gedryf deur gunstige eise wat regdeur die groep ondervind is, sowel as 'n wesentlike verbetering in die koste-tot-inkomste-verhouding, veral by Youi vanweë skaalvoordele en koste-doeltreffendheid. Effektief vanaf 1 Maart 2017 het RMI Holdings 'n belang van 29.9% bekom in Hastings Group Holdings plc (Hastings), 'n snelgroeiende en beweeglike digitale algemene versekeraar, hoofsaaklik bedrywig in die Britse motormark. Die bydrae deur Hastings is gedeeltelik teengewerk deur die hoër befondsingskoste van die verkryging.

Nywerheid

Total se bydrae tot Remgro se wesensverdienste het R224 miljoen (2016: R291 miljoen) bedra. Die afname was hoofsaaklik weens 'n laer raffineringsmarge. Remgro se deel van KTH se resultate het 'n wins van R34 miljoen (2016: 'n verlies van R229 miljoen) bedra. In die vergelykende tydperk is KTH se resultate negatief beïnvloed deur ongunstige billike waarde aanpassings wat verband hou met die beleggings in Exxaro Resources Beperk en MMI Holdings Beperk se voorkeuraandeel. Air Products en Wispeco se bydrae tot wesensverdienste het onderskeidelik R298 miljoen en R169 miljoen (2016: R275 miljoen en R144 miljoen) bedra, terwyl PGSI R25 miljoen (2016: R36 miljoen) tot Remgro se wesensverdienste bygedra het.

Infrastruktuur

Grindrod se bydrae tot Remgro se wesensverdienste het 'n verlies van R48 miljoen (2016: 'n verlies van R45 miljoen) bedra. Die verhoogde verlies is hoofsaaklik as gevolg van die onderprestasie van die spoorwegmonteerbesighede weens die gebrek aan vraag vir lokomotiewe, die voortgesette onsekerheid in die mynbedryf en die lae vlak van bedrywigheid in Suidelike Afrika. Die verhoogde verlies is deels teengewerk deur 'n verbetering in droëvrag-verskepingstariewe en kommoditeitsmarkte, asook die landboubesighede. In die jaar onder oorsig het die CIV-groep R110 miljoen (2016: R64 miljoen) tot wesensverdienste bygedra. Die toename is hoofsaaklik weens stewige groei in annuïteitsinkomste. Remgro se belang in SEACOM se verlies het R33 miljoen (2016: 'n verlies van R33 miljoen) bedra.

Media en sport

Media en sport bestaan hoofsaaklik uit die belange in eMedia Investments en verskeie sportbelange, waaronder die belange in rugby-franchises, sowel as die Stellenbosch Academy of Sport. eMedia Investments se bydrae tot Remgro se wesensverdienste het tot R49 miljoen (2016: R28 miljoen) toegeneem, hoofsaaklik vanweë hoër advertensie-inkomste danksy 'n verbetering in markaandeel. Die toename is deels teengewerk deur hoër besigheidsontwikkelingskoste, asook voortgesette beleggings in die multikanaalbesigheid.

Ander beleggings

Die bydrae van ander beleggings tot wesensverdienste het R70 miljoen (2016: R67 miljoen) bedra, waarvan Business Partners se bydrae R54 miljoen (2016: R48 miljoen) was.

Sentrale tesourie en ander netto korporatiewe koste

Finansieringsinkomste het R349 miljoen (2016: R125 miljoen) bedra. Hierdie toename is hoofsaaklik vanweë hoër gemiddelde kontantbalanse as gevolg van Remgro se regte-uitgifte. Finansieringskoste bestaan hoofsaaklik uit rente ten bedrae van R893 miljoen (2016: R466 miljoen) en eenmalige transaksiekoste in die vergelykende tydperk ten bedrae van R402 miljoen, wat verband hou met Mediclinic se regte-uitgifte en die Al Noor-transaksie. Die positiewe billike waarde aanpassing van R687 miljoen hou verband met die afname in die waarde van die omruilopsie van die omruilbare skuldbriewe (2016: negatiewe billike waarde aanpassing van R730 miljoen). Ander netto korporatiewe koste het R143 miljoen (2016: R251 miljoen) bedra. Die vergelykende tydperk sluit transaksie- en finansieringskoste ten bedrae van R115 miljoen in en hou verband met Remgro se verkryging van Spire. Hierdie koste is van Mediclinic verhaal, buite wesensverdienste, as deel van die Spire-verkoopsom.
